

‘সব ধর্মমাঝে ত্যাগধর্ম সার ভুবনে’—এইটি কবির বর্ণনীয় সামান্য (general) সত্য ; একেই সমর্থন করা হয়েছে—‘মেঘ বরিষার নিজেই নাশিয়াদেয় বৃষ্টিধার’ এই বিশেষ (particular) নজীরটির দ্বারা ।

**প্রতিবস্তুপমার সম্বন্ধে দুটো কথা অত্যন্ত মূল্যবান :**

**প্রথম**—প্রতিবস্তুপমায় প্রকৃতে অপ্রকৃতে সামান্যবিশেষভাব একেবারেই থাকে না। প্রকৃত অপ্রকৃত দুইই হয় সামান্য, না হয় বিশেষ। সাদৃশ্যাত্মক অলঙ্কারমাত্রেরই এটি সাধারণ লক্ষণ।

**দ্বিতীয়**—হুই বাক্যে উপমেয়-উপমান এবং বস্তুপ্রতিবস্তুভাবে সাধারণ ধর্ম থাকা সত্ত্বেও অলঙ্কার প্রতিবস্তুপমা সবক্ষেত্রে নাও হ’তে পারে। যেমন,

‘অলকগুচ্ছ আলসে লুটায় তোমার ললাটতলে—

মধুর আবেশে ঝিমায় ভ্রমর স্বর্ণকমলদলে।’—শ. চ.

‘আলসে লুটায়’ আর ‘মধুর আবেশে ঝিমায়’ তাৎপর্যে এক—বস্তুপ্রতিবস্তু-ভাবে সাধারণ ধর্ম ; উপমেয় ‘অলকগুচ্ছ’, উপমান ‘ভ্রমর’। অতএব—অতএব প্রতিবস্তুপমা ? মনে তাই হয় ; কিন্তু অলঙ্কার এখানে প্রতীয়মান উৎপ্রেক্ষা। আশাতদৃষ্টিতে বাক্য দুটি ; কিন্তু ‘যেন’-র বন্ধনে দুয়ে মিলে একটি—‘যেন’ উহ। একগুচ্ছ অলক তোমার কপালে লুটিয়ে রয়েছে, (যেন) একটি ভোমরা প’ড়ে রয়েছে স্বর্ণপদ্মের পাপড়িতে।

**প্রতিবস্তুপমার আরও কয়েকটি উদাহরণ :**

(viii) “সাস্বিকের ঠিক উষ্টোপিঠেই থাকে তামসিক, পূর্ণিমারই অল্পপারে  
অমাবস্তা।” —রবীন্দ্রনাথ।

(ix) “বিনা স্বদেশীয় ভাষা পুরে কি আশা ?  
কত নদী সরোবর কিবা ফল চাতকীর ?  
ধারাজল বিনে কভু ঘুচে কি তুষা ?”—রামনিধি গুপ্ত  
( নিধুবাবু )।

(x) “জীবন-উজ্জানে তোর ঘোঁষন-কুহুম-ভাতি  
কতদিন রবে ?  
নীরবিন্দু দুর্বাদলে নিত্য কিরে ঝলঝলে ?”—মধুসূদন।

যে অলঙ্কারে

(ক) উপমেয় এবং উপমান দুটি পৃথক স্বাধীন বাক্যে থাকে, (খ) উপমেয় আর উপমানের ধর্ম বিভিন্ন হওয়া সত্ত্বেও প্রণিধানগম্য ভাবসাদৃশ্যে ধর্মদুটি বিশ্বপ্রতিবিম্বভাবাপন্ন সাধারণ ধর্মে পরিণত হয় এবং (গ) তুলনাবাচক শব্দের প্রয়োগ থাকে না, তার নাম দৃষ্টান্ত।

প্রতিবস্তুরূপমায় শুধু সাধারণ ধর্মটিই বস্তুপ্রতিবস্তুভাবাপন্ন; কিন্তু দৃষ্টান্তে উপমেয়-উপমান বিশ্বপ্রতিবিম্ব এবং সাধারণ ধর্মও বিশ্বপ্রতিবিম্বভাবাপন্ন। এই পার্থক্যটি মূল্যবান।

(i) “কথাগুলো যদি বানানো হয় দোষ কী,

কিন্তু চমৎকার—

হীরে-বসানো সোনার ফুল কি সত্য, তবুও কি সত্য নয়।”

—রবীন্দ্রনাথ।

—‘বানানো’ আর ‘হীরে-বসানো সোনার’ যথাক্রমে ‘কথা’ আর ‘ফুল’-এর সম্পূর্ণ বিভিন্ন দুটি ধর্ম। বলা বাহুল্য যে ‘সোনার’ কথাটি বিশেষণপদ (স্বর্ণনির্মিত), ‘ফুল’-এর বিশেষণ। ধর্মদুটি যতই বিভিন্ন হোক, ‘হীরে-বসানো সোনার ফুল’ কৃত্রিম বলে ‘বানানো কথা’-র সঙ্গে এর স্তম্ভর ভাবসাদৃশ্য রয়েছে। এই কারণে বানানো আর হীরে-বসানো সোনার বিশ্বপ্রতিবিম্বভাবাপন্ন সাধারণ ধর্ম। অতএব ‘কথা’ আর ‘ফুল’ যথাক্রমে বিশ্বপ্রতিবিম্বভাবের উপমেয় উপমান। শুধু তাই নয়। ‘চমৎকার’ আর ‘তবুও কি সত্য নয়?’ এ দুটিও বিশ্বপ্রতিবিম্বভাবের সাধারণ ধর্ম। ‘তবুও কি সত্য নয়?’ কাকুর দ্বারা প্রকাশ করছে—তবুও সত্য। কবি বলেছেন, হীরে-বসানো সোনার ফুল সত্য নয় তবু সত্য। এর তাৎপর্য কি? বস্তুগত দৃষ্টিতে সত্য নয়, কিন্তু ভাবদৃষ্টিতে সত্য। মন যাকে মানস্বে স্বীকার করে নেয়, তাই সত্য; বস্তুগতভাবে যতই সে মিথ্যা হোক, তাতে কিছুই যায় আসে না। এই দৃষ্টিতেই কবি বলেছেন, ‘কথাগুলো যদি বানানো হয় দোষ কী, কিন্তু চমৎকার।’ এখন দেখা যাচ্ছে যে বানানো কথার চমৎকারিত্ব আর হীরে-বসানো সোনার ফুলের সত্যত্ব ভাবে সদৃশ। ‘চমৎকার’ কথাটার মানে “আত্মপ্রধানা বুদ্ধি:”, বলেছেন আচার্য্য অভিনবগুপ্ত

(ধ্বজালোক ৪।১৬)। রবীন্দ্রনাথের এই কবিতাংশটি দৃষ্টান্ত অলঙ্কারের মধুর উদাহরণ।

(ii) “বুঝনি এত কথা আঁখির মুখরতা ?—আছিলে নিবোধ এত কি ?  
গন্ধে বুঝনি কি গোপনে ফুটেছিল গুমরি কাঁটাবনে কেতকী।”

—কবিশেখর কালিদাস।

—শ্রীকৃষ্ণের প্রতি রাই কিশোরীর উক্তি। কৃষ্ণের প্রতি কিশোরীর পূর্ব-  
রাগ তাঁর মুখের ভাষায় প্রকাশমান ছিল না, নানাভাবে আভাসিত ছিল  
চোখের দৃষ্টিতে। কাঁটাবনে প্রস্ফুটিত কেতকী অদৃশ্য, গুপ্ত; কিন্তু বাতাসে  
ভেসে আসা তার গন্ধ সূচিত করে তার অস্তিত্ব। ‘এত কথা’—গোপন প্রেমের  
(কুলবধু রাধার পরপুরুষ শ্রীকৃষ্ণের প্রতি পূর্বরাগের) পরিচয়, মুখের ভাষায়  
যা প্রকাশিত করা যায় নাই, করতে হয়েছে আভাসিত চোখের ভাষার  
বহুমুখী ব্যঞ্জনা।

উপমেয়—কিশোরীর গোপন প্রেম (‘এত কথা’-র দ্বারা জ্ঞোতিত),

উপমান—গোপনে ফোটা কেতকী। **বিস্বপ্রতিবিশ্বভাবে**র সাধারণ ধর্ম  
‘আঁখির মুখরতা’ আর ‘গন্ধ’। অলঙ্কার দৃষ্টান্ত।

এই উদাহরণটিও চমৎকার। ‘আঁখির মুখরতা’ আর ‘গন্ধ’ সম্পূর্ণ বিভিন্ন  
হ’লেও সদৃশ, যেহেতু ছুটিতেই রয়েছে গোপনবস্তুর ইঙ্গিত।

(iii) “সভাজন দুঃখী রাজহুঃখে।

আধার জগৎ, মরি, ঘন আবরিলে  
দিননাথে।”

—মধুসূদন।

—‘সভাজন’ উপমেয়, ‘জগৎ’ উপমান; **বিস্বপ্রতিবিশ্বভাবে**র সাধারণ ধর্ম  
‘দুঃখী’-‘আধার’। আবার, ‘রাজা’ উপমেয়, ‘দিননাথ’ উপমান; **বিস্বপ্রতিবিশ্ব**  
সাধারণ ধর্ম ‘দুঃখ’-‘ঘন’ (মেঘ)।

(iv) “ছন্দের একটা স্রবিধা এই যে, ছন্দের স্বতই একটা মাধুর্য আছে;  
আর কিছু না হয় তো সেটাই একটা লাভ। শব্দ সন্দেহে ছানার অংশ  
নগণ্য হ’তে পারে কিন্তু অস্বস্ত চিনিটা পাওয়া যায়।” —রবীন্দ্রনাথ।

(v) “ছোট শিশু যদি উঠিতে না পারে মায়ের কোলে,  
হুয়ে প’ড়ে মাতা চুমা দিয়ে তারে বক্ষে তোলে।

সিদ্ধু যদি বা কল্লোল তুলি’ ছুঁতে না পারে,

নামি দিগন্তে দেয় পরশন গগন তারে।”—কালিদাস।

—শিশু, মাতা উপমেয়; সিদ্ধু, গগন বধাক্রমে ওদের উপমান। ‘হুয়ে

প'ড়ে' আর 'নামি' বস্তুপ্রতিবস্তু। তা হোক ; এদের নিয়ে চিন্তিত হওয়ার কারণ নাই, যেহেতু বর্তমান আলোচনায় এরা গোঁণ। 'উষ্টিতে না পারে মায়ের কোলে' আর 'কল্লোল তুলি' ছুঁতে না পারে' 'শিশু-সিন্ধু'-সূত্রে বিশ্বপ্রতিবিম্বভাবে সাধারণ ধর্ম ; আবার, 'চুমা দিয়ে তারে বক্ষে তোলৈ' আর 'দেয় পরশন তারে' 'মাতা-গগন'-সূত্রে বিশ্বপ্রতিবিম্বভাবে সাধারণ ধর্ম। অলঙ্কার দৃষ্টান্ত।

(vi) “রবিকর যবে, দেবি, পশে বনস্থলে  
তমোময়, নিজগুণে আলো করে বনে  
সে কিরণ ;.....  
যথা পদার্পণ তুমি কর, মধুমতি !  
কেন না হইবে স্ত্রী সর্কজন তথা ?”—মধুসূদন।

(vii) “মিলনে আছিলে বাধা  
শুধু এক ঠাই, বিরহে টুটিয়া বাধা  
আজি বিশ্বময় ব্যাপ্ত হ'য়ে গেছ প্রিয়ে,  
তোমারে দেখিতে পাই সর্বত্র চাহিয়ে।  
ধূপ দধ্ব হ'য়ে গেছে, গন্ধবাস্প তার  
পূর্ণ করি' ফেলিয়াছে আজি চারিধার।”—রবীন্দ্রনাথ।

—এখানেও 'ব্যাপ্ত' আর 'পূর্ণ' বস্তুপ্রতিবস্তু ; তবু দৃষ্টান্ত অলঙ্কার অক্ষুণ্ণই আছে। বেশ মন দিয়ে এই উদাহরণটিকে বুঝতে হবে। ধূপ=ধূপবর্ত্তি (ধূপকাঠি) যার সঙ্কীর্ণসীমায় মিলিয়ে থাকে গন্ধ (অগ্নিসংযোগের পূর্বে)। উপমেয়—মিলনবন্ধন (বা সঙ্কীর্ণসীমায় প্রিয়াকে সীমায়িত ক'রে রেখেছিল), উপমান—ধূপ ; 'বিরহে টুটিয়া' আর 'দধ্ব হ'য়ে' বিশ্বপ্রতিবিশ্ব সাধারণ ধর্ম। আর উপমেয়—'প্রিয়া', উপমান—'গন্ধবাস্প' ; 'তোমারে দেখিতে পাই সর্বত্র চাহিয়ে' আর 'পূর্ণ করি ফেলিয়াছে আজি চারিধার' (দিগ্দিগন্তর থেকে গন্ধ এসে প্রবেশ করছে নাসারন্ধ্রে— এই হ'ল চরণটির ব্যঙ্গার্থ) বিশ্বপ্রতিবিশ্বভাবে সাধারণ ধর্ম।

মন্তব্য : পঞ্চম আর সপ্তম উদাহরণে বস্তুপ্রতিবস্তুভাবে সাধারণ ধর্ম দেখিয়েও তাদের উপেক্ষা করেছি তাদের স্থান উদাহরণছটিতে গোঁণ বলে। এছটিতে প্রতিবস্তুপনা আর দৃষ্টান্তের সঙ্গ হয়ছে, তাও বলব না ; কারণ দৃষ্টান্তলক্ষণই প্রবল, সমুজ্জল। 'অলঙ্কারসর্কষ' গ্রন্থে কৃষক একটি উদাহরণ

দিয়েছেন দৃষ্টান্ত অলঙ্কারের, বার উপমেয়বাক্যে ‘জানীতে’ আর উপমানবাক্যে ‘জানাতি’ আছে ( হুটাই একার্থক—জানা বা জ্ঞান )। রূপক বলছেন, যদিও জানা ( জ্ঞান )-রূপ একই ধর্ম নির্দিষ্ট রয়েছে, তবু এরাই যে উপমেয়র নিয়ন্তা তা নয় ( “অত্র যন্তপি জ্ঞানাখ্যঃ একঃ ধর্মঃ নির্দিষ্টঃ, তথাপি ন এতন্নিবন্ধনম্ উপম্যং বিবক্ষিতম্” )। ব্যাখ্যাকার মন্তব্য করছেন, ‘যন্তপি’ ইত্যাদি ব’লে অলঙ্কার এখানে যে **প্রতিবস্তুপমা** নয়, এইটুকু জানিয়ে দেওয়া হ’ল ( অলঙ্কারসর্বস্ব—২৬ সূত্র )।

(viii) “কুলশাংগুলার গর্ভে জনম বাহার,  
সেই দাসীপুত্র হবে মেবারের রাজা ?  
খণ্ডোতে হরিয়া লবে দ্যুতি চন্দ্রমার ?  
মৃগেন্দ্র-বিক্রমে বনে বিচরিবে অজা ?  
অসুরে অমৃতভাণ্ড করিবে হরণ ?  
কুকুরে যজ্ঞের হবি করিবে লেহন ?”—বহুগোপাল ।

—এখানে **মালাদৃষ্টান্ত** হয়েছে ।

(ix) “সবহু মতজ্জে মোতি নাহি মানি ।  
সকল কণ্ঠে নাহি কোকিল-বাণী ॥  
সকল সময় নহ ঋতু বসন্ত ।  
সকল পুরুখনারী নহ গুণবস্ত ॥”—বিছাপতি ।

এখানে উপমেয় ( পুরুখনারী ) শেষ বাক্যে । মোতির ( মৌক্তিকের ) মর্যাদা, কোকিলবাণীর মাধুর্য, বসন্তের সৌন্দর্য এবং পুরুখনারীর গুণবস্তা বিভিন্ন হ’লেও তাৎপর্থে সাম্য বোঝাচ্ছে । এটিও **মালাদৃষ্টান্ত** ।

(x) “আমার জীবন যদি তোমাদের সুন্দর আননে  
দিয়ে যায় কোনোদিন আনন্দের দীপ্তরেখা আঁকি,  
তাহারে গ্রহণ ক’রো ফুলমুখে, শুধায়ো না মনে  
সে আনন্দ জোগায়েছে জীবনের কত বড় ফাঁকি ।  
তোমার শ্রিয়র শুভ বাহুঘেরা সোনার কঙ্কণে  
তাহারে মানালে ভালো, কতো বহি দহিল সে সোনা—  
সে খোঁজে কি কাজ ?” —অজিত দত্ত ।

—আমার জীবন যদি তোমাদের আনন্দ দিতে পারে, সেই আনন্দ নিয়েই তৃপ্ত থেকো, তোমার শ্রিয়র বাহুতে সোনার কাঁকন মানায় যদি, সেই তো